

ПРЕЗИДЕНТ

Мемлекет басшысы Премьер-министрдің орынбасары Қанат Бозымбаевты қабылдады



Қасым-Жомарт Тоқаевқа өңірлерді дамыту бойынша қолға алынған шаралар туралы есеп берілді. Мемлекет басшысының тапсырмаларын орындау мақсатында Өңірлік саясат жөніндегі жобалық кеңсе құрылды.

Қанат Бозымбаев Өңірлік стандарттар жүйесін енгізу жөнінде баяндады. Бұл облыстар арасындағы және аймақ ішіндегі инфрақұрылымға қол жеткізу барысында байқалатын теңсіздікті төмендетуге, елді мекендерді дамытуды тиімді жоспарлауға мүмкіндік береді.

Қасым-Жомарт Тоқаевқа энергетикалық және коммуналдық секторларды жаңғырту бойынша Ұлттық жобаның жүзеге асырылуы жөнінде ақпарат берілді. Жоба аясында 86 мың шақырым коммуналдық желінің құрылысы мен жаңғырту жұмыстары және жалпы қуаты 7,3 ГВт болатын қосымша генерация көздерін іске қосу қарастырылған. Осы ретте отандық тауар өндірушілердің тұрғын үй-коммуналдық шаруашылық және энергетика салаларындағы әлеуеті барынша пайдаланылады.

Сондай-ақ Мемлекет басшысына тұрғындарды су және көріз жүйесімен сапалы әрі үздіксіз қамтамасыз ету үшін коммуналдық жүйелерді басқару бойынша трансұлттық компаниялармен келіссөздер жүргізілгені жөнінде айтылды.

Президент өңірлерді теңгерімді дамыту маңызды міндеттердің бірі екенін атап өтті. Қасым-Жомарт Тоқаев инженерлік-коммуналдық инфрақұрылымды жаңғырту, тұрғын үй-коммуналдық шаруашылығына бірыңғай цифрлы экожүйе енгізу, су саласын цифрландыру және су үнемдеу технологияларын қолдану жөнінде бірқатар нақты тапсырма берді.

ortcom.kz

ҮКІМЕТ

Үкімет әлеуметтік салаға жұмсалатын шығыстарға бақылауды күшейтеді



Үкімет отырысының қорытындысы бойынша өткен баспасөз мәслихаты барысында Премьер-министр Олжас Бектенов журналистердің әлеуметтік саладағы шығындарға қатысты сұрағына жауап берді, деп жазады Egemen.kz.

Республикалық бюджеттің 50%-дан астамы жыл сайын әлеуметтік саланы қаржыландыруға бағытталады. Қаражат зейнетақыға, бюджет қызметкерлерінің жалақысына, көп балалы отбасыларға, аз қамтылған азаматтарға, мүгедектігі бар адамдарға арналған жәрдемақыларға, сондай-ақ мектеп, аурухана салуға және инфрақұрылымды дамытуға жұмсалады. Бұл бағытта Үкімет жүйелі жұмыс жүргізіп жатыр.

Сонымен қатар қазіргі уақытта бөлінетін ресурстарды пайдалану тиімділігіне бақылау күшейтілген. Бірқатар параметр мен тәсілдерді қайта бағалау жүргізіледі.

Премьер-министр жүргізілген талдау шеңберінде әлеуметтік әділеттілік қағидатына қайшы келетін қолдау шараларын теріс пайдалану фактілері анықталғанын атап өтті.

«Біз қазір еліміздің барлық халқын алты санатқа бөлген жолмен жүріп жатырмыз. Отбасының цифрлық картасы жұмыс істейді, деректер цифрланған, барлығы әл-ауқат деңгейі бойынша бөлінеді. Алтыншы санат – табыс деңгейі жеткілікті жоғары отбасылар мен адамдар. Алтыншы санатты біз әлеуметтік көмек алушылар қатарынан алып тастаймыз, өзін қамтамасыз ете алмайтындарға, жұмыс істей алмайтындарға көбірек көңіл бөлеміз. Мысалы, балалармен айналысатындықтан көп балалы аналар, денсаулығына байланысты мүмкіндігі шектеулі азаматтар жұмыс істей алмайды. Біз оларға көп көңіл бөлетін боламыз. Әкінішке орай, бізде әлеуметтік теңсіздік пен әлеуметтік алаяқтық фактілері бар. Біз қазір әр істі жеке-жеке шешіп, барлық басқа схемалардың жолын кесеміз. Әлеуметтік көмек өзін қамтамасыз ете алмайтын адамдарға көрсетілуі тиіс», деді Олжас Бектенов.

Олжас Бектенов ЖІӨ-нің екі еселенуі туралы: Бұл барынша биік мақсат, бірақ қол жеткізуге болады

Премьер-министр Олжас Бектенов Үкімет отырысының қорытындысы бойынша өткен баспасөз мәслихатында Мемлекет басшысының 2029 жылға қарай экономиканы әртараптандыру арқылы \$450 млрд-қа дейін қол жеткізуге қатысты берген тапсырмасы аясында журналистердің қойған сұрақтарына жауап берді, деп хабарлайды Primeminister.kz.

Үкімет экономиканың өсуін ынталандыру үшін бірқатар бағытты белгіледі. Бұл мұнай өңдеу, металлургияны жаңғырту, ТКШ инфрақұрылымын ауқымды жаңарту, электр энергетикасы, ауыл шаруашылығы және минералдық-шикізат базасын, оның ішінде сирек кездесетін металдарды ұлғайту.

Сондай-ақ жаңа салаларды дамытуда үлкен әлеует бар, олардың қатарында мұнай-газ химиясы, автомобиль жасау, теміржол машина жасау, тыңайтқыштар өндіру бар. Жыл сайын өңдеу өнеркәсібі мен АӨК-де жаңа жобалар енгізіледі.

Өсудің негізгі нүктелерін дамыту ұлттық инфрақұрылымдық жоспарды жүзеге асыруға көңіл бөлініп, қажетті өнеркәсіптік және көліктік инфрақұрылыммен қамтамасыз етілетін болады.

Бұдан бөлек, осы жылдан бастап «Бәйтерек» холдингі желісі бойынша басым секторларды қаржыландыру айтарлықтай ұлғаюда.

2029 жылға дейін жаңа өндірістерді іске қосумен 17 ірі жобаны жүзеге асыру басталды. Олардың ішінде химия өнеркәсібіндегі автомобильдер, бутадиең, аммиак және карбамид өндіретін зауыттар, металлургиялық кластер, мыс балқыту зауыты, сондай-ақ Шымкент МӨЗ өндірістік қуаттарын кеңейту бар.

ortcom.kz

Ауылды орнықты дамыту үшін әлеуметтік және инфрақұрылымдық жаңғырту керек



Сенат депутаты Талғат Жүнісов Ақмола облысындағы Шортанды және Зеренді аудандарының тұрғындарымен кездесті. Сапар барысында әлеуметтік маңызы бар объектілердің құрылысына мониторинг жасауға және ауылдық аумақтарды дамытудың басым міндеттерін талқылауға баса назар аударылды.

Сенатор Шортанды ауданындағы Бозайғыр ауылында 300

орындық дене шынықтыру-сауықтыру кешені құрылысының барысымен танысты. Орындалған құрылыс және инженерлік жұмыстар, оның ішінде металл конструкциясын монтаждау, бетондау, коммуникацияны салу және өрлеу жұмыстары қаралды. Сондай-ақ нысандардың ауыл тұрғындарына қолжетімді болуы, құрылысты аяқтау мерзімінің сақталуы және оның орындалу сапасы туралы айтылды.

Депутат жергілікті жалпы білім беретін мектепте болып, педагогикалық ұжыммен кездесті. Пікірлесу барысында оқу үдерісін жабдықтау, кадр даярлау және оқыту жағдайын жақсарту мәселелері талқыланды. Сенатор ауылды дамытуда спорт пен білім беруден бастап инженерлік инфрақұрылымға дейін кешенді көзқарас қажет екенін атап өтті.

Сенатор Зеренді ауылында болған кезде ауданы 1 379 шаршы метр және құны 1 млрд теңгеден асатын жаңа тарихи-өлкетану мұражайының құрылысымен танысты. Көктерек ауылында ұзындығы 13,5 км су құбыры мен су жинау желісін салу бойынша жұмыстарды көріп шықты.

Депутат сапар қорытындысы бойынша өңірдегі өмір сапасы мен әлеуметтік тұрақтылықты арттыру үшін іске асып жатқан нысандардың маңыздылығын атап өтті. Айтылған барлық мәселелер мен ұсыныстар бақылауға алынады және одан әрі шешу үшін тиісті мемлекеттік органдарға жеткізілетін болады.

senate.parlam.kz

● **Жұмыс сапарлары**

Әлеуметтік маңызы бар жобаларға ерекше назар

ҚР Парламенті Мәжілісінің депутаты Айна Мүсірәлімова жұмыс сапарымен Зеренді ауданында болды.

Сапар барысында депутат Айдабол ауылындағы дәрігерлік амбулаторияның жұмысымен танысып, Зерендідегі балалар-жасөспірімдер спорт мектебінде, аудан орталығының кіреберісінде салынып жатқан тарихи-өлкетану мұражайында болып, Балалар музыка мектебінің ұжымымен кездесті. Сапар қорытындысы бойынша Айна Ермекқызы аудан тұрғындарының өмір сүру сапасын жақсарту үшін әлеуметтік-мәдени инфрақұрылымды дамытудың аса маңыздылығын атап өтті.

Дәл осы күні парламентарий аудандық мәслихаттың депутаттарымен, «АМАНАТ» партиясы фракциясының мүшелерімен кездесті. Қатысушылардың бірі Викторова ауылындағы Мәдениет үйіне күрделі жөндеу жұмыстарын жүргізуге жәрдемдесу туралы өтініш білдірді, «Зеренді ауданының санитарлық-эпидемиологиялық бақылау бөлімі» ММ қыз-



меткерлері тарапынан «Дипломмен ауылға» бағдарламасына өзгерістер енгізу туралы ұжымдық сауал жолданды, нақтырақ айтқанда қызметке келгендердің міндетті өтеу мерзімін анықтау, себебі қазіргі таңда мекемеде мамандардың жетіспеушілігі орын алуда. ҚР Жер кодексіне табиғатты пайдалану бөлігін реттейтін өзгерістер енгізуге, «Жас Мама» мемлекеттік бағдарламасына аз қамтылған от-

басы балаларын ауыл шаруашылығы колледждеріне оқуға жеңілдікпен қабылдау және т.б. өтініштер білдірілді.

Қойылған сауалдарға жауап берген Парламент Мәжілісінің депутаты қатысушылардың өтініштерін жүзеге асыруға атсалысатынына сендірді.

А.Мүсірәлімова жұмыс сапарын азаматтарды жеке мәселелері бойынша қабылдаумен аяқтады. **Өз ақпаратымыздан.**

Жерлесіміз чемпион атанды



Жапонияның Химедзи қаласында пауэрлифтингтен Азия және Мұхит аралдары чемпионаты мәресіне жетті.

Айтулы дода қорытындысында жерлесіміз Зеренді өңірінің тумасы А. Малькова-Солопова, 52 келіге дейінгі салмақ дәрежесінде, барлық қарсыластарынан басым түсіп, чемпион атағын жеңіп алды.

Жеңімпаз қарындасымыз күнделікті өмір ағымында да сан қырымен танылып жүрген тұлға. Алена Юрьевна қоғамдық жұмыстармен де белсенді айналысады, ол Ақмола облыстық ассамблеяның, «Ассамблея жастары» республикалық қоғамдық бірлестігінің өңірлік өкілдігінің мүшесі және мемлекеттік тілді насихаттау және дамыту орталығының белсендісі болып табылады.

Аленаны жарыстағы жеңісімен шын жүректен құттықтаймыз!

Жеңісті күндерің көп болсын!

«Қоғамдық келісім» КММ баспасөз қызметі.